

Leksyon

14

"ANG CRISTO- HANON UG ANG IYANG KAUGA- LINGON"



1. Ang Cristohanon ba maoy tag-iya sa iyang kinabuhi?
 - Dili. Ang Ginoo maoy tag-iya sa kinabuhi sa usa ka Cristohanon, tungod kay kini iyang gipalit sa iyang kaugalingong dugo. I Pedro 1:18, 19. Kamo sayud nga gikan sa walay hinungdan nga paggawi nga inyong napanunod gikan sa inyong mga ginikanan kamo gitubos, dili pinaagi sa mga butang madugta ingon sa salapi o bulawan, kondili sa bililhong dugo ni Cristo, nga daw sa nating karnero nga walay buling o hugaw.

2. Sa unsa nga paagi gamiton sa usa ka Cristohanon ang iyang kinabuhi?

- Iya kining gamiton alang sa himaya sa Dios.

I Mga taga-Corinto 6:20. Gipalit na kamo sa usa ka bili. Busa himayaa ninyo ang Dios diha sa inyong lawas.

3. Sumala sa Bibliya, unsay bili nga pagabayran aron mahimong usa ka Cristohanon?

- Ang Bibliya nagsulti kanato nga aron mahimong Cristohanon, gikinahanglan ang paghikalimot sa atong kaugalingon ug mosunod kang Jesus.

Lukas 9:23. Ug siya miingon sa tanan, "Kon adunay buot mosunod kanako, kinahanglan magdumili siya sa iyang kaugalingon ug magpas-an sa iyang krus matag-adlaw ug magasunod kanako".

4. Unsay buot ipasabot sa paghikalimot sa kaugalingon?

- Mahikalimot kita sa atong kaugalingon sa dihang batonon nato ang kabubut-on sa Dios, ug dili ang atong kaugalingong kabubut-on.

Juan 6:38. Kay ako nanaug gikan sa langit, dili sa pagbuhat sa akong kaugalingong kabubut-on, kondili sa kabubut-on sa nagpadala kanako.

Mateo 7:21. Dili ang tanang nagaingon **kanako Ginoo, Ginoo makasulod sa ging-**

harian sa langit, kondili ang nagatuman sa kabubut-on sa akong Amahan nga anaa sa langit.

5. Unsaon sa usa ka Cristohanon ang pagpas-an sa iyang krus adlaw-adlaw?

- Ang Cristohanon magabuhat gayud sa matarung adlaw-adlaw bisan supak kini sa iyang naandan nga kinaiya.

Mga taga-Roma 13:14. Hinonoa isul-ob ninyo ang Ginoong JesuCristo, ug ayaw kamo pagtagana alang sa unod, sa pagtagbaw sa mga pangibog niini.

Mga Taga-Galacia 2:20. Dili na ako ang nabuhi kondili si Cristo ang nabuhi sa sulod nako; ug ang kinabuhi nga akong gikinabuhi sa lawas akong ginakinabuhi pinaagi sa akong pagtoo sa Anak sa Dios, nga nahigugma kanako ug mitugyan sa iyang kaugalingon alang kanako.

6. Nganong gikinahanglan sa usa ka Cristohanon ang mahusay ug mahinlo nga lawas ug hunahuna?

- Gikinahanglan sa usa ka Cristohanon ang malunsay ug mahinlo nga lawas ug hunahuna tungod kay siya puy-anan sa Espiritu Santo.

I-Corinto 6:19. Wala ba kamo masayud nga ang inyong lawas templo sa Espiritu Santo nga nagapuyo sa sulod ninyo, ug ug kini inyong nabatongan gikan sa Dios? Kamo dili na inyo sa inyong kaugalingon.

I Corinto 3:17. Kon adunay molaglag sa templo sa Dios, siya pagpalaglagon sa Dios.

7. Sa unsang paagi ang mga bisyo sama sa pagpanabako ug paggamit sa mga tambal nga kontrabando sama sa opium, marijuana ug uban pang maingon-ingon niini, makadaot sa lawas?

- Kining mga bisyoha makadaut sa lawas sa tawo ug maka pahamubo sa iyang kinabuhi.

Mga taga-Roma 6:16. Wala ba kamo masayud nga kon itugyan ninyo ang inyong kaugalingon ingon nga mga masinugtanong ulipon ngadto sa bisan kinsa, kamo nga ulipon niya nga inyong ginasugot, mga ulipon nga iya sa sala nga nagahatud ngadto sa kamatayon, o iya sa pagkamasinugtanon nga nagahatud ngadto sa pagkamatarung?

8. Sa unsang paagi kining mga bisyoha masumpo?

- Kining mga bisyoha masumpo pinaagi sa paghangyo sa Dios nga iya kitang tabangan nga bag-ohon ang atong pagkinabuhi. Nga magatutok kaniya lamang adlaw adlaw alang sa kalig-on aron dili kita madaldal sa pagkasala.

Salmo 37:5. Itugyan mo kang Jehovah ang imong dalan; ug sumalig ka uasb kaniya, ug siya magabuhat niana.

Mga Taga-Efeso 4:13. Mahimo ko ang

tanang butang pinaagi kaniya nga naga-palig-on kanako.

ANG IMONG PAGABUHATON

1. Mag-ampo ikaw alang sa mga bag-ong Cristohanon nga imong nasayran nga wala pa gayud makatangtang sa ilang mga bisyo sama sa pagpanabako, pag-inum ug mga makahubog ug uban pa.
2. Sublia pagbasa ang matag punto niining maong leksyon uban sa pag-ampo. Itug-yan ang imong kaugalingon ngadto sa Dios, ug hangyoa siya nga tabangan ikaw adlaw adlaw sa pagkinabuhi sumala sa imong mga nakat-onan.
3. Sublia pagsag-ulo ang mga sag-ulohon gikan sa unang leksyon hangtud sa ika-napulog-tulo nga leksyon.
4. Kon masag-ulo na nimo pag-ayo ang mga sag-ulohon, tubaga ang mga pangutana sa Talaan sa Tinun-an alang sa ika-napulog upat nga leksyon.